





P1

粉鏡春山寫出峨眉烟翠墨池綺浪分來錦水波  
瀾宜乎灑翰驚人飛才絕代也至若琴趣樂章之  
遺調金荃蘭畹之新聲簾捲秋風黃花銷瘦箏彈  
夜月紅豆飄零亦復巧奪蟬鈿香傳蝶拍遂使嬌  
花寵柳遜此風華滴粉搓酥慙其綺麗豈非美兼  
衆體慧擅多能者歟芸幸接蘭襟欣披寶笈英瑤  
贈我濃薰豆蔻之香繡段貽君清浣薔薇之露自  
知學步竊愧效顰詞非錦瑟之工序乏玉臺之艷  
聊祛首疾代彼萱蘇猥託心知鐫之瓊玖壬戌二  
月中澣金匱楊芸蕊淵序



生香館詩卷上

秋海棠

搖曳秋光怯曉寒  
恨無金屋貯卿看  
最憐幾點懷人淚  
灑對西風獨倚闌

晚涼

綠楊深處暮鷗藏  
點點流螢漾曲廊  
頻捲湘波招月色  
一庭花雨晚風涼

錦城留別許林風姊

折柳愁縈萬里橋  
那能知己話通宵  
數聲風笛情無限  
三疊陽關路正遙  
握手每懷同絮語  
簪花猶

長洲李佩金紉蘭



憶理鈿翹蘭閨聚首知何日憑仗鱗鴻慰寂寥

落花

非煙非霧繡簾前香韻依依劇可憐杜宇一聲春  
去也多愁多病落花天

春日寄懷蜀中許林風

萬里停雲繫晤思香消午篆日遲遲杏花枝上纔  
凝蠟楊柳梢頭乍翦絲聽雨尚疑巴峽夜看花猶  
憶錦城時雁鴻望斷關山遠梁屋清輝兩地知  
回首蠶叢路渺漫短檠坐對怯春寒雲深劔閣春  
將老夢到蓉城夜未闌姊妹花開情繾綣琅玕竹  
報信平安臨池無限纏綿意封就魚書又折看

代湘芷大弟秋夜懷人

輿簾隱約未分明車走輕雷萬種情回首河梁空  
悵望夕陽相送暗心驚

幽窓風雨不成眠別有傷秋賦短篇挑盡殘燈天  
欲曙夢隨蘭棹破江煙

菊影

西風搖曳弄霜姿採得黃華慰所思瘦共一窓燈  
燼後澹畱三徑月明時依依忍負秋光好耿耿空  
憐傲節持靜挹孤芳如晤對興餘握管漫哦詩

柳絮

小立河橋夕照前東風吹暖過三眠朦朧庭院渾

疑霧隱約簾櫳欲化煙偶傍花魂迷窈窕爲縈蝶  
夢故纏綿江南江北間憑眺好句偏輸謝女先  
賦得醑醑香夢怯春殘

欲將標格問東風香到人間夢乍通欹枕薄寒愁  
料峭罨簾殘雪悵迷濛霓裳舞罷雲初淨瓊帶飄  
來月半籠最是飛英成雅會芬芳爭戀晚春中

賦得水面迴風聚落花

風迴水面感微渦兩岸疎花更落多紅雨幾番添  
潑灑綠波隨處費遮羅移來柔櫓香初散戲到輕  
鷗影乍過最愛夕陽明滅裏一奩雲鏡逗青螺

題楊芸芬三妹墨蘭畫軸

寫得湘江九畹姿燈前題句雨催詩圖中不管春  
來去廿四番風總未知

偶成

光陰駒過隙人事幾番更花信草初長愁根春又  
生夢隨流水遠心逐曉雲輕懷抱誰能慰降憂借  
酒兵

七夕用玉溪生韻

一水盈盈悵別離剛逢佳節是靈期那堪澹月微  
雲候恰值斜風細雨時碧海有情流脈脈畫屏無  
睡夜遲遲輸他乞得人間巧繞向花盤幾許絲

採蓮曲

阿儂家住水雲鄉六幅輕綃澹澹粧怪底花間諸  
女伴笑拈紅豆打鴛鴦  
纖纖素手掬晴波欲折還憐並蒂荷人解藕絲縈  
別恨儂知蓮子苦心多  
薄羅衫子茜裙新搖入橫塘亂白蘋忽聽歌聲人  
不見柳陰深處是西鄰

柳枝詞

春風無力弄輕烟嫋嫋長堤別恨牽莫向樽前吹  
玉笛空驚憔悴送流年

夏夜納涼坐月彈琴有懷偶賦

晚雨收殘暑輕粧淡埽蛾蟬聲吟露葉螢影度風

荷紉扇裁明月湘簾捲碧波相思人不見千里渺  
愁何

春日書懷

愁緒纏綿欲遣難枕函聲送曉鐘殘鵲啼夜月魂  
將黯鴛轉東風夢漸闌數卷新書隨意讀一奩春  
水照人寒年來俗事縈懷抱憔悴腰圍舊帶寬

惜春辭

東皇著意催花放疎窓寂靜茶煙漾年年春到費  
商量今歲逢春倍惆悵乍寒乍暖釀花天何處閨  
中不解憐寄語風姨休太妬少畱春住小庭前柳  
條弄色花如笑捲簾人怯東風峭倦繡紅窓午夢

遙奈何人事知多少寥寥庭院日遲遲燕語鶯啼  
有所思一霎韶華如過隙可憐花落斷腸時花開  
花落愁難託晴絲百丈春難縛何事纏綿勝去年  
殘英飛絮飄簾箔關心最是過花晨惱煞深閨夢  
裏人天涯有盡愁難盡不是傷春是惜春

春日感懷

曉鏡容非昔年華逝水流淡烟浮草色微雨惜春  
愁漸覺歡心少由來別恨稠雁行憐聚散萱草不  
忘憂

病懷有感

斗室圍香寶鴨溫悄無人處掩朱門曉風瘦盡桃

花影夜月啼殘杜宇魂萬事如雲無定所三春似  
夢不留痕愁根暗共花爭發惆悵閒庭煙雨昏

驛柳四首

驛亭去路一程程可奈楊枝到處生宛宛垂雲攀  
折恨蕭蕭苦雨別離情心傷灞岸歌驪曲人立河  
梁唱渭城看慣青驄來往熟更無攜酒聽流鶯  
縱緣憔悴想腰圍不爲裝綿故撲衣靜引蟬聲偏  
惱聽倦藏鷗影忽驚飛千條路直行難盡一道春  
連去不歸知否有人勞悵望鞭梢遙指舊園扉  
歸心空逐馬蹄忙千古魂銷大道傍姓雪送人三  
月莫西風吹夢九秋霜偶因籌筆還拈句不爲封



生香館言卷上  
三  
侯更斷腸輸與梅花消息好解將春色寄江鄉  
白下門前萬樹柔天涯還見綠陰留春閨別恨風  
前思故國殘陽笛裏秋十里遠籠江店月一帘高  
颺酒家樓年年古道傷行役搖落關河滿目愁

題美人枕書圖

小窓日午碧陰沈撩起閒愁睡思侵輸與丹青稱  
妙手一生難畫美人心

秋雁四首

無端燕市起悲歌帶得商聲又渡河千里歸心隨  
月遠一年愁思入秋多水邊就夢雲無影天際驚  
寒夜有波屈宋風流零落盡那堪重向洞庭過

晚來風雨曉來霜不爲悲秋也斷腸蘆葦作花多  
冷澹鷺鷥無語亦淒涼途歧容易迷歸路棲穩何  
如在故鄉一種白頭綠底事田田祇解覆鴛鴦  
誰倚高樓一笛橫憑空吹落苦吟聲能鳴未必真  
爲福有迹多嫌累此生入世豈容繒繳避就人終  
覺羽毛輕越鳧楚乙從題品識字何曾爲近名  
夜庭飛度恨漫漫多恐江南到亦難偶聽弓絃驚  
寤寐久疎箋字報平安箏無急柱寧辭鼓琴有哀  
絃未忍彈可奈西風吹別調離羣還較此間寒

雪夜

冷結釭花瘦慵添寶篆殘凍雲飛不起清夢夜成

難好句愁中得名花病裏看平生無限意多付劫  
灰寒

暮春感賦寄懷林風姊

日長庭院靜沈沈閒向縹緗覓舊吟世事何須多  
著意人生能得幾知心愁當有淚愁猶淺怨到無  
言怨始深綠瘦楊枝飛盡絮海棠開謝又成陰  
簾外輕寒月似銀伶俜鶴骨夜吟呻倦飛蝶夢因  
難遠愁去詩魂未肯親孤寂莫如鐙後影無慘更  
有卷中人瑤清舊事憑誰問小劫塵寰廿一春

壬戌七夕楊蕊淵姊招同陳雪蘭陳蘅芳集

琴清閣分題得乞巧詞

新蟾逗影明珠箔絲絲涼露吹煙薄微吟容易感  
秋心對月穿針愁腕弱鴛鴦艷錦別恨多七襄巧  
樣投金梭纖雲低映榆花瘦碧海離情吹淚波丁  
東漏箭銀虬咽璫鋪流彩光如雪蛛絲縈斷九迴  
腸驗取離心愁百結雲屏紅燭光垂垂燒殘心篆  
桐陰移不因乞巧下堦拜但祝人間無別離

癸亥春夜心痛疾發感賦四章次林風冬日

雜感韻即寄代柬

寥落年來意關心客裏春小樓初上月深院更無  
人愛讀常忘夜工愁豈爲貧釭花和淚墮孤照一  
鐙親

心痛難成寐愁多百事非離魂當日斷別夢近來  
稀塞北春纔醒江南鷺早飛家山風景好只我未  
能歸

箏柱怨年華長安未是家窮通知有命生死豈無  
涯書卷消殘劫豪尖寫幻花蓮心含蕙苦况聽訴  
琵琶

讀書明大義豈獨爲才名慷慨悲歌發淒涼怨思  
生安閒非易得辛苦自生成夢戀重衾暖覺來春  
鳥聲

秋夜懷許林風王晚蘭賦此代柬

幾年不見許飛瓊悵望瑤臺十二城明月多情來

獨夜西風作意送秋聲漫拈紅豆歌長恨靜掩銀  
屏背短檠斗帳涼生蘭燭炷亂蛩爭語夢難成  
嬌小堪憐萼綠華塵寰一去渺天涯數竿竹影搖  
青幙一縷茶煙漾碧紗憔悴秋魂寒戀夢伶俚病  
蝶瘦依花彩鸞已作文簫偶忘却琳宮是故家  
芙蓉露冷晚煙收翡翠簾櫳玉一鈎贏得詩詞原  
合病生來情性只宜秋緘題花葉纏綿恨細吐春  
絲宛轉愁惟恐畫欄鸚鵡醒悄將錦字讀從頭  
無聊閒炷水沈香瑟瑟羅衣怯夜涼秋雨秋風關  
塞冷湘雲湘水海天荒耽書祇爲愁無奈諱病誰  
知恨轉長不信年來消瘦甚開箱怕檢舊衣裳

生香館詩卷上終



嘉慶御覽  
開卷於吳門

長洲許翰屏仿宋書周宜和董刊

生香館詩卷下



長洲李佩金紉蘭

秋夜書懷

雲母窓前玉鏡臺無聊只共影徘徊愁魂縹緲不知處潛待黃昏枕上來

年年怊悵過花晨憔悴青鸞鏡裏春千古風流誰第一輸他福慧管夫人

追憶璇閨嬌小時阿娘終日喚書癡每因夜讀朝眠足惟恐堂前責起遲

離愁如髮不勝梳宛轉蕉心未易舒最是親言忘不得當時悔煞教兒書



百幅烏闌綵筆舒十三年紀賦閑居心防阿母叨  
叨說偷典金釵爲買書

此日思親淚萬行好憑魂夢到瀟湘絨愁只恐傷  
親意強寫歡言更斷腸

淒斷離魂五夜鐘冷吟閒醉總無恡生憎不識江  
南路夢到家山第幾峯

曉臨秋水畫愁顰隨意梳粧不鬪新如此年華如  
此過相憐惟有鏡中人

乙丑春日將南歸留別中州道署

青箱檢點舊羅衣社燕依人又復歸到日家山春  
正好雜花生樹亂鶯飛

惜別依依玉鏡前總無離恨也淒然思親倍覺心  
魂遠南望瀟湘北望燕

花朝感懷時南歸有期即寄別都中諸閨友

撩人芳緒又花朝春過江南第幾橋泥蹟未消梁  
苑雪離魂已度浙江潮鶯花故里縈歸夢風雨天

涯送客橈回首白雲親舍遠家山雖近一身遙  
短檠孤館奈愁何錦瑟華年逝水過鵲化春魂啼

怨語魚傳錦字起愁波每憎紅豆相思少那似秋

蓮苦蕙多遙聽隔花虬箭永一痕殘月轉明螺

金錘香消蕙帳寒凝愁孤坐夜漫漫三生天少憐  
才意一別人疑隔世看不惜此時歌者苦但傷他

日賞音難空堦夜色涼於水珠斗無聲轉玉闌

寄懷諸閨友

記昨春明共唱酬星辰遙憶舊珠樓辛夷花下歌  
金縷丁字簾前詠玉鈎霧夕霞朝愁黯黯雲堦月  
地夜悠悠新詩欲倩迦陵鳥好寄相思到十洲

商邨曉發車中偶賦

烏綾札髻鬢雲蓬亂服粗疎總未工粉鏡塵封光  
黯淡疎鐙寒峭影朦朧惺忪月魄留殘夢替戾鈴  
聲絮曉風輾輾雙輪腸共轉倩魂淒絕五更中

舟行晚景偶成寄湘芷大弟

閒倚篷窓日已昏依依雲樹暖人村三分夢雨吹

無跡一抹涼煙澹有痕古渡夕陽誼客語空江新  
月愴離魂東風轉瞬秋期近遲爾西牕翦燭論

維揚舟次感成二律

邗江烟水碧於油花雨靈風滯畫舟一曲艷歌新  
水調二分明月古離愁風流帝子家何在薄倖詩  
人跡尚留滿目荒涼添感慨穠春如此况殘秋  
盪漿追尋廿四橋紫簫聲斷玉人遙落花啼鳥春  
將晚芳草殘陽怨未消螢苑今成麋鹿臥錦帆早  
化綵雲飄祇留蹤地千枝柳依舊風前鬪舞腰

舟行見月

不眠人在木蘭舟繡被香消獨夜愁弱柳千枝和

恨遠柔情一往向東流銷魂碧水昏於夢弔影銀蟾曲似鈎莫道穠春烟景好一經風雨便如秋

厲樊榭集中有和閨秀陳坤維詩即次原韻  
補屋牽蘿若個知閒愁珍重託新詩羸來筆硯貧  
難療典到琴書事可悲詞客自應多困苦才人原  
不諱情癡知他展卷吟成後幾許傷心寫別時

秋日湖上晚歸即事偶成

錦鳩呼雨盡情啼柳外樓高夕照低湖水湖山秋  
一碧花枝扶夢過橋西  
輕艫維住綠楊腰煙樹空濛鎖六橋隔岸美人招  
不得吹殘璧月怨瓊簫

柳影同湘芷靜野曉潭諸弟作

春來無處不魂銷搖曳東風拂畫橈借月暗傳張  
緒態臨波如寫小蠻腰亂飛晴雪花千樹倒映空  
江碧一條誰倚河梁橫短笛無邊愁思灞陵橋  
一溪煙雨漲羅羅曾記聽鶯載酒過落落拋醒涼  
鷺夢疎疎閃碎夕陽波陰移古堠迷荒草樓接新  
愁上翠蛾揮手暮雲人去遠西風憔悴奈秋何

春日懷林風姊

人事真如月盈虧易感憐年華愁裏度春色病中  
妍燕語重簾靜鶯梭碧柳穿梅花遙望贈蝶夢故  
留連紅豆相思子青鸞記別箋魂銷燈燼後目斷

雁聲前話雨知何日臨風憶昔年韶光不共賞天  
遠恨綿綿

楊柳風

漏洩春光花信遲拋來麗殿影參差輕煙綠上流  
鶯背一翦裁開萬縷絲

芭蕉雨

泠泠虛籟碧陰沈涼暈疎檠擁鼻吟料是閒愁消  
息至秋聲先到美人心

梧桐月

綠雲低覆小窓扉陰瘦秋魂星斗稀月姊似嫌人  
太淡故描濃翠上羅衣

梅花雪

亂飛玉屑點蒼苔疎影橫斜月鏡開寒倚繡簾吹  
柳絮冷香如雨撲人來

秋夜病懷雜感即寄林風

如此華年草草過香桃骨瘦奈愁何病懷反怕磨  
人問轉覺無端淚更多

翦翦輕寒透綺窓歸期已負菊花黃生來誤入繁  
華夢紙閣蘆簾羨孟光

西窓翦燭記君論解識愁根即慧根金纖他日梅  
花三百樹共鋤明月葬詩魂

庚午三月返棹武林時將赴洪都留別弟輩



經旬歡聚首團坐話宵分纔聽西窓雨俄飛南浦  
雲黯然歌別賦行矣悵離羣握手頻丁囑魚書惠  
我勤

自富陽至常山江行雜詠

天然圖畫此中開茅屋疎籬接翠苔怪得新描眉  
樣好曉山都向鏡中來

無恙江山往事非時人只解戀朝衣何如一舸歸  
來日借住先生舊釣磯

芳草蓬蓬綠漸肥新詞譜上十三徽一聲彈徹春  
陰破無數濃雲背雨飛

五兩風輕透綺寮載將離恨怨迢迢定知此後西

江水添得相思幾尺潮

夏日寄懷湘芷靜野曉潭諸弟

寥落天涯感索居別來清况近何如肯隨世俗銷  
豪氣莫謂家貧廢讀書異地鶯花空復爾故園風  
月渺愁余何時再聽聯牀雨歸奉雙親樂有餘  
控住輕陰上玉鈎蓬蓬新綠叫鞦韆落霞庭院孤  
如鷺夜雨房櫳冷似秋蜩枕蘧蘧飛別夢蛾燈昔  
昔照離愁相思積久成疎懶欲寄從何寫起頭  
萬事皆應如是觀人生離合最無端煙霞情性孤  
懷冷冰雪心腸傲骨寒惟許瑤琴依寂寞祇容明  
月共盤桓曇花不是人間種休並繁英一例看

酒醒燈昏玉漏沈起尋殘夢立花陰江淹才盡猶  
能賦庾信哀多豈廢吟病骨偏能知節序離懷容  
易著秋心近來詩格如人瘦恐入西風更不禁

秋夜曲病懷書感

紅蘭泣露空塔冷蕭蕭梧葉飄金井羅衾疊翠壓  
愁痕喘絲扶住清宵永西風惻惻晚寒增翦破湘  
波綠幾層青天碧海迢迢恨吹裂瓊簫喚不應當  
窓誰理迴文曲鴛鴦機上啼殘玉宛轉冰蠶萬縷  
絲靈梭難把離腸續欲寫瑤琴寄遠情一彈三歎  
未成聲秋燈弔影黃花瘦夜雨垂簾蟋蟀鳴無眠  
孤坐銀屏裏更深又聽霜鴻起此時悽斷有誰憐

藥鑪消碧香心死拚得嗔身化杜鵑淒涼寶瑟怨  
華年從今再返蓬山去穩坐耆尼九品蓮

甲戌正月八日哭許林風姊

相逢憶昔錦官城標格如蘭氣味清鸚鵡屏山曾  
聽雨海棠香國記聯盟未防小病能妨命却悔遲  
來已隔生賸有玉臺遺跡在斷牋殘墨淚縱橫  
飛瓊先我竟驂鸞十二樓高雙鬢寒夢影迷離燈  
黯黯雲波縹緲珮珊珊廿年雅合同心易一息彌  
留訣別難自是情癡疑未信傷心重檢素書看  
謝庭花落夢難圓泣向東風化杜鵑寶鏡塵封虛  
夜月玉琴聲絕慘離絃傷心不信三生石薄命都

慳一面緣從此梅花春信斷雙魚何處達重泉  
鳳去樓空簾竟牀爭禁奉倩不神傷輸君小劫偏  
長往祇我餘生枉斷腸罷結綵絲連愛縷虛傳瑤  
島返魂香夜窓搦管無窮憾一曲哀蟬淚萬行



生香館詩卷下終

嘉和商山卯  
開離於未明

長洲許翰屏仿宋書周宜和董刊

生香館詞卷上



長洲李佩金紉蘭

青衫濕

題潯陽送客圖

半帳冷月空江白楓荻晚煙橫歸鴻無數鄉心幾  
許如此秋聲尊前掩面淒淒切切細數生平琵琶  
哀怨青衫憔悴一樣消魂

月華清

望月感懷

久雨新晴銀河澄練盈盈一水清淺雲吐冰丸獨  
倚曲闌干畔情無限碧海青天愁如繭并刀難翦



誰見正雙眉深鎖淚痕劃面 素魄窺窓幽怨恨  
小院無人疎簾乍捲別有傷心寬褪舊時金釧祇  
贏得夜冷歸眠怯羅衣露珠點點輕換恐淒涼夢  
影短檠搖斷

清平樂

暮春午睡夢許林風姊醒後感作

榆錢柳絮春去愁難去簾捲玲瓏天欲暮醒後驚  
疑何處 可憐月魄花魂無聊怕到黃昏倚遍闌  
干十二離愁約上眉痕

鷓鴣天

春閨

曉起心慵對鏡前姊規啼徹落花天病中爲怯東  
風峭不捲珠簾鎮日眠 人悄悄思絲絲綠楊深  
鎖一谿煙供愁夜半中庭雨滴破吟魂到枕邊

梅花引

即景

澹煙籠碧簾櫳一縷爐香細細風畫樓東月如弓  
來與眉峯兩下鬪玲瓏 流鶯枝上春將去杜鵑  
聲裏魂何處意無窮句難工小立花叢含愁數落  
紅

蝶戀花

暮春雨中感作

蝶夢驚殘花已誤，怨紫愁紅，忽忽成香土。長日愛  
眠宵不寐，無聊覓句教鸚鵡。簷網留春花絡住，  
掠斷游絲，玉翦雙飛去。杜宇聲中愁幾許，濛濛落  
絮和煙雨。

前調

閨情

隨意拈豪消永晝，兜裏愁心，怎奈眉峯皺。時節落  
花人病後，重簾不放東風透。鏡裏年來非是舊，  
綠暗紅稀，人亦成春瘦。一夜無情風雨驟，呢喃燕  
語如私咒。

浪淘沙

寄懷林風

抱膝擁香篝，數盡更籌。綠波春草憶儂否，多少相  
思離別語，欲寫還休。燈火夜窗幽，新月如鉤。花  
魂蝶影暗牽愁，風雨連朝春去也，何計忘憂。

西子妝

題美人曉粧圖

曉氣如煙春寒似翦，好夢鴛鴦聲喚轉，一番情思倦。  
慳慳拂菱花碧紗窗，畔畫眉人遠，曾否念鏡中嬌  
面鎖，雙鬢多少閒愁，怨歸來始展。東風嬾不到，  
天涯那有魚和雁，瘦腰無力倚粧臺，掠雲鬟怕擡  
纖腕，鬢釵斜冪記當日，花枝輕撚，指尖尖笑染黛。

痕深淺

鵲踏枝

冬閨用漱玉詞韻

如水長天霜露凍風蕩簾波花影繽紛動別有銷魂誰領共鬢絲斜罨金釵重涼月侵人穿牖縫誰撫冰絃彈徹鸞和鳳一霎韶華原是夢曲瓊愁撼聲聲弄

眉嫵

新月用宋王碧山韻

乍黃昏庭院驟雨初過銀漢暮雲暝撩起閒情緒開簾拜一彎斜過虛逕曲闌倚穩逗眉痕如許離

恨蹙雙蛾悄向花閒立夜涼怯衣冷爭奈愁心難問又無端照我憔悴鸞鏡骨壓絲冰瘦帶圍減怕消三五圓景碧天路永盼那時盈滿重正此際黯消凝扶上秋千牆影

瀟湘夜雨

題葬花圖

雨雨風風花花草草一番春夢誰憐濛濛庭院絮如煙多化作綵雲飛散閒凝盼底事纏綿埋愁地掃將舊恨付與啼鵲瘦人天氣落花時節似水華年想箇儂病起悄立闌邊判幾許淚珠緘裏知多少綠怨紅殘游絲裊韶華難綰幽思上眉彎

減字木蘭花

夜雨書懷

雨昏燈暝窗外芭蕉敲夢冷點點聲聲故攪愁人  
睡不成更深漏永一縷餘香搖瘦影舊句低吟  
不是傷心不要聽

琴調相思引

題美人整琴圖

雪影條條裂一痕夜寒誰與訴秋魂冰絃欲整惆  
悵又還停何處西風吹夢冷涼絲先向鬢邊生  
回腸縷縷難續此時心

露華

殘月

星疎雲斂正蓮漏將殘樹影低轉忽逗惺忪依舊  
一痕秋淺憐渠那忍先眠夜夜照人清減還知否  
眉梢恨多偏是儂見小庭暑退紈扇便誤拜深  
深香裊心篆爭奈一回憔悴一回長歎賸得前度  
閒愁挂在寶簾銀蒜羅衣冷花魂和夢銷黯

一葉落

窗外芭蕉兩叢其一既枯復茁雨後遂萎  
賦此以弔

一葉落夢初覺今宵聽雨不如昨薄衾怯暮寒秋  
魂飄無著飄無著敲破聲聲柝

卜算子

秋閨

殘月度簾鈎秋夢和花瘦牆角獨兒吠夜分天碧  
斜珠斗 手熨舊羅衣似眉閒皺數盡清宵細  
細長坐到燈如豆

愁春未醒

題美人枕書圖

春魂愁鎖不許游絲牽引只無奈深叢蝴蝶約住  
芳魂香霧模糊撲簾花氣作黃昏東君知否生來  
識字即是愁根 倦掩道書除非夢裏覓箇分明  
那能游仙容易一霎曹騰眼尾低垂朦朧合了又

還醒卷中紅泪相思粒粒好認啼痕

風馬兒

本意

夜涼如水掩秋屏聽風也錚錚雨也錚錚攪亂愁  
心那得夢兒成更更 低垂羅帳擁桃笙見燈也  
冥冥香也冥冥斷續蛩音不住耳邊鳴聲聲

酷相思

紅豆

粒粒珊瑚金盒貯正別緒腸千縷幾猜認東風梅  
蕊吐人道是春何苦春道是人何苦 記曲頻拈  
纖手數欲寄與天涯阻向窓外輕調鸚鵡語花道



是鷓啼雨鷓道是花啼雨

惜分飛

送楊筠心芸芬織雲三姊妹南歸

楊柳牽愁情萬縷雲外征鴻遠度別夢隨風去煙  
波一棹江南路 蘆荻蕭蕭明月浦做出秋聲幾  
許不管離人苦此時欲語偏無語

繡停針

題陳蘅芳三姊倦繡圖

小院靜見輦日烘花鷲梭織錦檢點芸奩深碧淺  
紅無力繡牀斜凭葉遮蓮映刺一對鴛鴦棲穩綵  
絲欲整還停霎時柳眠花困 愁春清晝永聽杜

宇枝頭聲聲離恨翠影籠窓鸚鵡簾前低誦儂詩  
乍醒金錢怕問卜不出天涯芳草王孫歸信遠山  
斷煙痕迥

剔銀燈

詠燈

可奈黃昏時候見裊裊香縈金獸翠帳侵寒雲屏  
搖影一點疎花欲溜含嗔輕扣問小婢風簾下否  
獨背蘭缸枕手却只解照人儂慙卸髻將眠拈  
豪又起長夜撥殘紅豆爲誰孤瘦聽滴盡更更玉  
漏

金縷曲

仲春四日以詞代柬寄林風姊於松江  
斗室青燈夕釀花天濃陰如墨韶華堪惜何事春  
來秋又去絮亂蓬飄無迹回首處煙波遙隔蝴蝶  
不來香夢杳照儂愁一線彎彎魄疎花溜篆香熟  
愁多翻道心兒窄洗殘妝泪珠鏡沙柔腸暗織  
花氣迷離春影瘦懷抱離情千疊檢那樣愁心寫  
出悄囑東風飛燕子寄相思來往傳佳什須鄭重  
春消息

虞美人

題團扇圖

輕綃玉瘦猶嫌重憔悴桐花鳳魂絲已是恐難勝

有甚心情還去拜雙星 湖山雨洗新陰嫩綠遍  
苔衣潤冰紈無力撲流螢小院涼生月上又黃昏  
百字令

春曉用漱玉詞韻

三分春色却二分離緒重簾深閉曉日烘晴猶料  
峭香暝一庭花氣天蘸微雲葉篩疎影諳遍閒中  
味晝長無事生涯書卷堪寄 將次檢點羅衣輕  
添半臂掩紗屏斜倚懊惱枝頭聞杜宇舊恨新愁  
喚起風翦裁紅雨絲梳碧枉却東風意海棠開否  
小鬟回報還未

蝶戀花

壬戌花朝後三日喜楊蕊淵二姊枉顧即

次見贈原韻

日午小闌花氣颺弄粉吟香且喜知音賞迎得好  
風開錦障許同蘭籍名依傍 秋水冰壺神逸朗  
麗句如仙詞格秦蘇上投贈雲藍勞靜想璫瑤愧  
報酬珠唱

淡語嚼梅清味永百和香煎共滌春山茗若問相  
思詩作證花閒姊妹雙雙認 纖雨空庭幽夢醒  
草腳愁生碧長宵來病捲起半簾湘水冷東風吹  
墮輕雲影

賣花聲

暮春感懷

眉影控簾釘花補苔痕滿身香霧嫩寒侵怨入杜  
鵲聲裏血獨自愁吟 玉笛咽離情草長紅心月  
鈎空弔美人魂憐爾為花猶薄命何況儂今

鬢雲鬆令

得林風信後作

好風吹鴻信至料得書成濕透桃花紙宛轉迴文  
無限思纔念完時却又重頭起 寄來情封去淚  
待到愁邊已過當時意認取江南紅豆子粒粒分  
明盡是離人漬

滿庭芳

暮春偕楊蕊淵查紉芳諸姊妹看海棠  
溪水拖藍遙山凝碧素心聯袂佳晨青畦緩度雨  
洗一犁春風引殘霞漾影垂楊外煙鎖橋橫聽花  
杪梵鐘遠遞鴛鴦語罵金鈴 闌邊紅玉瑩錦江春  
色移種名根見嬌姿淺暈乍醒芳魂愁在杜鵑聲  
裏啼破了新綠如雲歸鴉急斜陽黯澹情思遶虛  
邨

生查子

送春

把酒問東風怨入花鈴語祇解送春歸未肯吹愁  
去 雲影蕩晴煙簾外飄香雨在煞柳絲長不繫

韶華住

菩薩蠻

題吳蘭雪新田十憶圖

半簾香雨家山遠晴絲暖織春煙軟况聽子規聲  
思歸更不禁 花前瑤管勸一曲歌珠串怱悵憶  
江南穠華三月天 花院奉觴

綠蕪春遠裙腰襯尋詩天氣新晴穩池草夢初醒  
窓紗鏤翠痕 小庭人靜處兩兩幽禽語猶記擘  
吟箋閒凭卍字闌 草堂尋句

野塘緩趁清游屐垂楊瘦到無聊碧風皺水粼粼  
迴旋蕩縠紋 鴛梭花底織燕翦澄波色紅雨半

溪烟人家畫裏山 柘塘春步

香煎豆蔻屏紗透文窗煙暝濃陰覆蟬曳別枝風  
涼飄一葉桐 芸編消永晝山字吟肩瘦凝睇送

歸鴉斷雲烘晚霞 桐屋讀書

水天如鏡明秋霽曉鐘斷續山坳寺煙外澹斜陽  
松花落石牀 吟魂飛不起愁在蒼茫裏雲逗一  
痕青登臨無限情 蘇山秋望

庭籠翠幙清如水綠天陰裏茶煙起湘榻設桃笙  
簾波碧一泓 挑殘青鳳脰話瘦釭花冷瀾茗記

當時敲詩人睡遲 蕉陰茗話

荻花冷淡清溪畔一痕晴雪蒼烟晚淺石枕中流

盟鷗溪水頭 菱歌何處起知在蘆叢裏波活半

江藍織雲弄遠天 石溪鷗伴

晴峯向晚傷心碧幾聲縹緲橫秋笛楓葉亂雲堆  
松風颺葛衣 水邊漁唱散墟落柴門掩林外鳥  
爭飛夕陽牛背歸 牛均吹笛

冷芳採取攜吟屐寒煙深鎖春消息數點綻冰花  
啁啾翠羽譁 水天雲斷處情繞孤山路彷彿到

江鄉驚回清夢香 煙隴探梅

春畦小步吟懷淡急流如瀑飛銀練洗石響泠泠  
依稀聽雨聲 平陂新漲淺碧影連空遠何日得  
歸耕稻花香裏行 稻田聽水

金縷曲

壬戌暮春送湘芷大弟玉田讀書

追憶兒時事在書窗同心硯席十三年紀讀瘦缸  
花蓮漏溢月墮涼煙似水只餘得而今憔悴潦草  
詩詞終是累總無端歷盡悲和喜歌芍藥將離矣  
殘香支夢縈愁細話連宵雖然小別也多離味  
飛羽年華須自惜莫把光陰輕棄更一語丁寧須  
記親爲春風頻失意博庭歡望爾成名慰止不住  
盈盈淚

鎖窓寒

題雪豔圖

鎖骨凝冰虬枝綴玉峭寒庭院燈孤夢瘦愁絕美  
人天遠傍闌干橫斜數枝恍疑雪海珊瑚現看春  
魂寫出花疎月澹十分清艷 簾捲瓊瑤片正亂  
點簷前鬢絲輕眉暗香盈袖素萼折來低撚料離  
心定憶江南故園幾番風信轉送黃昏翠羽驚寒  
凍蕊霜華泣

鬢雲鬆令

夏夜納涼邀蕊淵同作

竹庭幽蓮漏永蘭夜無慘可奈愁人醒幾點螢光  
流曲逕細細荷風捲碎玲瓏影 翠屏深爐篆靜  
臨月殘妝雲匣開金鏡玉笛隣牆吹未穩葉葉涼

生露下單衣冷

菩薩蠻

秋夜書懷寄查紉芳

冰輪碾破遙空碧  
砧聲敲冷相思夕  
望斷雁來天  
瀟湘煙水寒  
玲瓏花裏月知否  
人閒別一樣去  
年秋如何幾樣愁

金縷曲

仲秋送畹蘭妹歸吳江

惜別腸千縷最關心  
拈花寫韻瑣牕絮  
語瘦盡詩  
魂扶不起堪歎舊時儔  
侶祇半晌萍緣歡聚  
屈指到家殘菊候  
正吳江楓落秋如許  
聽一舸蕭蕭雨

分飛雁影迷歸路  
轉丁寧烟村水驛薄寒須護  
珍重加餐宜努力  
莫把閒愁頻賦酒醒後  
今宵何處只我思鄉歸  
未得仗西風吹夢隨  
君去雙袖濕  
離情苦

沁園春

秋夜病懷書感

清夜迴腸百緒紛紜  
悽然泪零覺天涯  
離恨癡魂黯黯  
宵深肺病短夢惺惺  
霜葉辭枝寒蟬咽露粉  
月玲瓏上綺櫺  
孤光冷偏照人庭院  
別樣分明屏山瘦影  
矜嶢見背壁殘燈  
死復醒嘆身如年歷  
暗知淒節心同刻  
漏記盡長更生小工愁  
從來善

哭何況而今寥落情無踪極倩喘絲半縷扶住黃昏

南鄉子

題梁溪詩冢圖

遙望九龍岑斷碣殘碑秋草深縹緲詩魂招不得  
黃昏冷月蒼涼山鬼吟好句怕飄零肯付秦灰  
蕩夕曛卜得埋愁三尺地孤墳十丈靈光透碧雲

金縷曲

寒夜同蕊淵二姊茗話有感

蕭瑟閒庭院掩文窓薄寒料峭暗燈頻翦從道宵  
長蓮漏永比似閒愁還短化萬縷紫纏如繭款約

輕魂隨夢去遶天涯不怕風吹斷簷鐸語又驚轉  
一丸冷魄霜華滿算年年照人如鏡幾般淒怨  
惆悵家園心縹緲多少海思霞念恐此日遂成虛  
願可惜江南花月好到春來空付鶯和燕歸路杳  
碧雲遠

賀新郎

送湘芷大弟南歸就婚蔣氏吉期乃新正  
望後一日也

香綰同心篆趁明蟾良宵二八芳梅初綻繡仗紗  
籠行婀娜是處笙歌鳳管正璧月瓊枝潑灑迎得  
青溪人似玉喜璇閨合卺鴛鴦宴紅燭底人爭看



蕭郎自是神仙眷倚屏山衣香釧韻幾回偷盼  
惱亂燈光搖不定斜映檀腮半面聽蓮漏穿花三  
轉明日綠窓拈綵筆對芙蓉商略眉深淺攜翠袖  
整金鈿

南歌子

寄懷湘芷

爐篆搖寒綠缸花墜冷紅非關閒恨鎖眉峯却怪  
年年多半別離中殘月明珠箔疎星澹碧空此  
時情味想應同遙憶雞聲苑店曉村風

采桑子

冬夜雜懷

涼蟾似水空簾靜瘦影玲瓏香雪迷濛燈暈凝寒  
火不紅薰爐獨擁無聊甚一笛悲風五夜疎鐘  
知否淒涼兩地同蕊淵

燈前夜夜金錢卜細數行人夢繞離亭水驛煙村  
第幾程年來慣是輕離別墜雨零星寥落詩魂  
祇賸當時月一痕湘芷

清游最憶芙蓉郭約伴花朝折柬相邀戲蝶尋香  
上翠翹秋風無奈歌驪曲瘦減吟腰淚搵鮫綃

錦水多情咽暮潮林風

玉梅花下凝情望碧海青天十二闌干風露人閒  
一樣寒含愁悄對姮娥說才見團圞早又彎環

那得清光夜夜圓

晚蘭

金縷曲

歲暮有懷林風晚蘭於吳中

淚泣桃花紙倩青鸞殷勤寄與萼華仙子舊日瑤  
清諸姊妹都向塵寰去矣怕此後再來無計試問  
嫦娥緣底恨却依然獨處琳宮裏人世事知無味  
寒宵坐瘦釭花蕊記當時挑燈閒話三山往事  
慧語關心偏愜意自許此生知己却不料君先歸  
里同住江南猶恨遠隔盈盈一片吳淞水况天末  
人迢遞

蝶戀花

壬戌除夕

紅燭籠香檀篆細雜坐隨歡倍是愁滋味爆竹聲  
中愁去未明朝又恐從新起 最憶當年今夕事  
柏酒春盤燈下藏鈎戲斜倚屏山無限意不情不  
緒清清地

東風第一枝

癸亥元旦喜雪次蕊淵二姊韻

門掩梨花庭飛蝶粉素彩縈窓凝曙銀裝十二闌  
干喜逗煙光媚嫵東風弄影見吹起半簾香霧試  
糜丸硯凍微烘也效謝家吟絮 細展誦雲藍佳  
句正亂撒瑤華催賦歌裁白紵輕翻曲按羽衣低

舞漫揎羅袖撥爐火重添檀炷眩雙眸萬頃瑤田  
春在空香深處

蜨戀花

偶成

窄地簾波寒料峭午夢惺忪一榻茶煙裊手撥殘  
灰添鵲腦錦囊檢點焚餘稿倦倚銀屏愁悄悄  
總覺心情不似當年好一髮青山雲縹緲夕陽影  
裏看歸鳥

金縷曲

自題生香館詞尾寄林風畹蘭

往事思量徧玉臺前雙眉青鬥幾時曾展費盡心

魂詞百首蠶老尚餘殘繭認滿紙泪痕猶泣珍重  
寄君紅豆句鎮相思何日還相見知兩地共腸斷  
三生悔煞耽文翰到而今零箋賸墨依然焚硯  
骨肉遠離知己別對景不勝淒怨料此恨古今難  
免烟月家山無恙在到江南重覓當時伴算此外  
無他願

鬢雲鬆令

春感和蕊淵二姊韻

玉爲心金鑄泪薄暝簾前燕啄香泥墜春色依然  
人事改填就新詞教與鸚哥背夢如雲愁似醉  
誰放風箏吹墮秋千外鏡掩歲蕤慵染黛小病初

瘳怯怯輕寒耐

百字令

春夜聞雁

蘭缸花暝聽沈沈蓮漏閒愁如髮况是殘宵聞雁  
語叫得雲波欲裂秋託蘆花春憎燕子辛苦關河  
闊問君何事年年來往天末從道繫帛傳書當  
時塞外此日何曾達知我淒涼身世感除是窓前  
明月憶弟情深思親夢遠淚搵羅巾濕輪腸宛轉  
此心能向誰說

金縷曲

暮春月夜懷林風畹蘭於吳中時予將赴

中州感賦此解即寄奉東不自知情之  
一往而深也

月照梨花白背銀屏疎檠黯淡薄寒猶怯煙暝星  
搖青欲墮幾樹香桃紅濕恰正是銷魂時節夢影  
迷離歸路遠聽啼鴉染遍春山碧飛不度滄江濶  
柔腸細綴丁香結想於今去原有恨住還無益  
兩地相思終不見何似翻然輕別怕此後更無消  
息一點墨痕千點淚看蠻牋都漬殷紅色數虬箭  
四更徹

百字令

題虎山玩月圖

香添芸餅乍披圖省識吾家太白石上霜華看激  
灑入夜游氛都滅松籟吟秋金波瀉影千頃琉璃  
澈誰吹橫笛餘音空外如髮 追昔金虎墳荒吳  
宮劔冷只剩當時月坐對層巒看轉碧一線烟痕  
青裂錦瑟初停嬌歌又起好景無虛設欲行又住  
留連幾度難別

百字令

新秋即事燈下撥悶

嫩晴庭院見餘霞散綺明河清淺茶沸瓶笙香浥  
浥剗地涼風似翦燈暈孤青煙搖瘦碧夜色屏紗  
淡井梧墮葉飛來滿紙秋怨 忽聽鈿篋聲聲隔

牆吹度離思天涯遠閒煞碧闌干外月逗影潛窺  
銀蒜病不禁秋愁多怯夢心較癡雲嬾無悰吟罷  
羅衫淚點猶泣

金縷曲

代仙帆送友人

怕聽驪駒發正無聊將離開老醪醺飛雪我亦天  
涯商去住一片鄉心難說算人海暫留鴻迹爲有  
才名遭衆忌只五湖風月容狂客須不羨二千石  
河橋弱柳傷心碧怪枝頭聲聲杜宇催歸太急  
隨意煙霞收筆底莫厭滄江遼濶望珍重雲藍頻  
達信是古人詩句好更那堪客裏還傷別寫不盡

巴歛拙



生香館詞卷上 終



嘉慶御覽  
開離於吳

長洲許翰屏仿宋書周宜和董刊



